



La citad da Cuira enturn l'onn 1900.



FOTO PD La nova staziun d'autos da posta, erigida il 1994.

FOTO N. PITARO

Da la Helvetica al temp preschent

Instorgia da la citad da Cuira, 3. part

Constituziun, sistem politic, administrazion ed infrastruttura

Durant l'occupaziun franzosa (l'emprima giada il 1799) è vegnida dismess l'obligaziun da far part ad ina mastergnanza, e la citad da Cuira è vegnida amministrada d'ina regenza municipal. La mediaziun dal 1803 ha permess tranter auter a las mastergnanzas da recuperar lur pussanza politica. La critica creschenta al sistem electoral (betg individual, mabain tenor mastergnanza), a la mancanza d'ina separaziun da las pussanzas ed a l'ineffacitad da l'administrazion ha manà il 1841 a la nova lescha municipale: las mastergnanzas èn vegnidas abolidas ed in Cussegl dad indesch s'occupava dals affars politics, polizials, administrativs, ecclesiastics e scolastics. La radunanza communal, introducida il 1850, era cumpetenta sulettamain en affars chantunals e federalis. Il 1852 è la Curt (1850 240 abitants) vegnida incorporada a la citad da Cuira. A partir dal 1862 han ins distingui tranter in Cussegl grond da la citad (legislativa, 21 commembers) ed in Cussegl pitschen (executiva, 7 commembers). Il 1875 ha la vishnanca politica remplazzà quella burgaisa sco suveran politic ed economic. Il 1904 è il Cussegl pitschen vegni reduci a tschintg commembers (president e schef dal Departament da construcziun en uffizi cumplain). Dapi il 1916 vegn elegi il Cussegl grond tenor il sistem da proporz. La radunanza communal è vegnida abolida il 1921, il Cussegl grond redimensiunà a 15 commembers il 1928. Il cussegl municipal (tschintg commembers), dirigì dal president da la citad, aveva sulettamain da survegliar l'administrazion. La revisiun dal 1964 ha creà in cussegl communal (legislativa, 21 commembers) ed in cussegl municipal (trais commembers en uffizi cumplain). Il 1988 han ins introduci era per il cussegl municipal ina limitaziun dal temp d'uffizi a trais legislaturas respectivamain a 12 onns.

Enturn il 1800 era Cuira dividi en duas gruppas politics: ils Aristocrats furmads dal clan dals Salis ed ils Patriots, ina partida reformista fundada da Johann Baptist von Tschanner (1751-1835). L'aboliziun da las mastergnanzas ha inizià il 1840 la predominanza liberala. Pir l'immigraziun da personas da regions catolic-conservativas e la secessiun dals Democrats (1919, pli tard PD resp. PPS) han indebli questa predominanza. Tut las trais partidas avevan lur gasetta quotidiana: «Der Freie Rätier» (fin il 1974), il «Bündner Tagblatt» e la «Bündner Zeitung». Il 1882 è vegni elegi l'emprim deputà socialdemocratic en il cussegl da la citad. En la perioda da legislatura 1997-2000 ha quel consistì da mintga-

mai in represchentant da la PS, da la PPS e da la PCD, il cussegl communal da sis represchentants da la PS, tschintg da la PLD, quatter da la PPS, trais da la PCD, dus da la PCS ed in da l'Alternativa sanestra.

En il sectur dal provediment social disponiv'ins, ultra da donaziuns e legats, d'ina chasa d'orfens (1844), da la chasa d'educaziun Plankis (1845), dal Bürgerheim (1847), d'in ospital municipal (1875) e da l'emprima chasa d'attempads (1924). L'Ospital da la Crusch (1853) è vegnì dischlocà il 1912 a la Loëstrasse. Il 1820 ha la citad da Cuira cumenzà ad illuminar las vias cun lanternas d'iei, a partir dal 1859 cun lampas da gas. Ils indrizs per il provediment d'aua èn vegnids renovads il 1880. A partir dal 1891 furniva ina centrala da la citad (engrondida il 1906, 1914 e 1947) forza electrica. Il 1895 ha Cuira cumprà la fabrica da gas (reconstruida il 1911) ed introduci il 1990 il gas natiral. Il 1905 han ins cumenzà a construir la chanelaziun. L'emprim bogn public datescha dal 1871.

Cuira n'era betg la chapitala da las Trais Lias, ma sulettamain il lieu principal da la Lia da la Chadé. Grazia a sia posiziun strategica, a la sedia episcopala ed a la forza economica era ella tuttina il center natiral dal Grischun. Il 1803 è ella daventada la sedia da la Regenza dal nov chantun Grischun ed il 1820 (definitivamain) la sedia dal parlament grischun. Oz sa chattan a Cuira la dretgira chantunala ed administrativa, las autoritads penales, la praschun chantunala Sennhof, la Clinica psichiatica chantunala Waldhaus (1892), l'Ospital chantunala da dunnas Fontana (1917) e l'Ospital chantunala e regionala retic (1941). Cuira dat era alloschi a la gronda part da las instituziuns ed associaziuns culturalas publicas e privatas sco era als meds da massa dal Grischun. La Confederaziun è represchentada oravant tut tras la posta, la viafier, l'administraziun da la duana e quella militar (plazza federala d'armas dapi il 1887). La commemoraziun da la Guerra a la Chalavaina il 1899 è stada impurtanta per l'identitad grischuna, entant che las festas federalas da tir (1842 e 1949, 1985), da gimnastica (dapi il 1845) e da chant (dapi il 1862) han rinforzà il sentiment naziunal svizzer.

Abitadi e populaziun

A la fin dal 18avel tschientaner era limità il spazi surfabrigà a la citad veglia actuala, al Welschdörfli ed a las rivas da la Ples-sur. Suenter la spazzada dal mir tranter l'Untertor ed il Hexenturm (1829) ha cumenzà la citad ad expandir vers il Rain. La demoliziun dal Schelmenturm il 1838 ha creà in ulterior access al nord. Il Post-

platz e la Poststrasse concorrenzavan ussa l'Untertor (spazzà il 1861) e la Reichsgasse sco axa principala. Il fossal è vegni empli e trasformà en la Grabenstrasse, flankada d'edifizis represchentativs (Villa Brunnengarten 1848, Villa Planta 1876, Bank- und Staatsgebäude 1878, Chasa da la posta 1904, Banca Chantunala 1911). Suenter la construcziun da la staziun (1858) al nord da la citad è daventada la Piazza da la posta il nov center urban. Ulterius accents han mess la transformaziun dal santeri Scaletta en in parc public e la construcziun da la Loëstrasse (1890-92) ch'ha avert in nov quartier d'abitare. In'emprima lescha da construcziun generala è entrata en vigor il 1896. La Ringstrasse, terminada il 1973, traversa il quartier dal Rain (che crescha continuadamain dapi ca. il 1900) cun ses blocs e sgrattaschiels Solaria (1961-62) e Lacuna (1964-1981). Il center da Cuira sa transformescha pli e pli en in quartier d'affars (butias e biros). Ultra dals edifizis surmenziunads datti anc auters stabiliments publics remargabels a Cuira: la chasa da scola Quader (1914), la baselgia da la S. Crusch (1969) ed ils edifizis da protecziun dals chats romans en il Welschdörfli.

L'avertura da la citad da Cuira sin il champ giuridic, economic ed urbanistic ha fatg crescer la populaziun per il tripl tranter il 1780 ed il 1860 e per il dubel dal 1860 al 1910. A la stagnaziun demografica dal tranterguerras è suandà a partir dals onns 1950 ina creschientscha rapida, accompagnada d'in boom da construir, oravant tut en il quartier dal Rain. La diminuziun dal surpli da naschentschas e la bilantscha da migraziun per part negativa han laschà stagnar la populaziun da Cuira suentar il 1976 a pauc dapli da 30 000 abitants.

Economia e traffic

Il traffic da transit tranter la Germania dal Sid e l'Italia dal Nord era tradizionalmain in'activitad dominanta a Cuira. El ha augmentà dapi il 1788 grazia a la construcziun da la Deutsche Strasse tranter il Pass S. Glièzi e Cuira. Ils spediturs da Cuira han contribuì il 1818-23 a la construcziun da las rutas dal Spieia e dal S. Bernardin ed han preni en maun la politica da transport dal Grischun. Il 1820-40 han ins realisà las vias sur ils pass dal Malöggia e dal Güglia, il 1858 ina lingia da las viafiers federalas da Rorschach a Cuira, il 1859 ina tala da Turitg a Cuira. Suentar l'avertura da la Viafier dal Gottard (1882), è la citad da Cuira s'orientada pli ferm al turissem, ella è però restada ina staziun, nua ch'ins midava da la viafier a la posta da chavals respectivamain da la Viafier svizra (Viafiers federalas svizas a partir dal 1902) a la Viafier

retica (per Tusaun 1896, l'Engiadina e Glion 1903, Arosa 1914). La citad da Cuira giavischava in'avertura da las vias chantunales a l'automobil, ella ha dentant stui sa sutmetter a la voluntad dal pivel grischun fin il 1925. La via da sviamment dal 1965 fa part da l'A13. La grond'expansiun da l'aglomeraziun da Cuira e l'augment dals pendularis han ventilà il davos temp dumondas davart il traffic local sco era davart la provegnientscha e la destinaziun dal traffic d'autos.

L'industria da tekstilas, installada a Cuira vers la fin dal 18avel tschientaner, n'ha betg pudì fitgar pe. Ma las vias charrablas, l'aboliziun da las mastergnanzas e l'access a las viafiers federalas han meglierà la situaziun periferica da Cuira ed effectua tranter auter la fundaziun d'ina fabrica da gas (1859) e da la filandaria Meiersboden (en funziun dal 1861-86). Cuira n'è dentant mai daventada ina citad d'industria. Las officinas da la Viafier svizra, pli tard da las Viafiers federalas svizas, èn stadas, cun maximal 300 lavurers, bunamain adina la pli gronda interpresa a Cuira. Firms tradizionalas eran per exempel la fabrica da pon Pedolin (1789-1982), la fabrica da pasta (dapi il 1841), la cularia (1892), la fabrica da tschigliat (1893) e las bierarias reticas (fusiunadas il 1902 a la Calanda-Bräu, oz Calanda Heineken Switzerland AG). En ils onns 1950 ha la promozion tras la citad attratg in pau industria. L'industria da tekstilas e da metal ha già difficultads en ils onns 1970/80. Atras interpresas èn vegnidas translocadas en l'aglomeraziun da Cuira, per exempel il 1989 la fabrica da stadairas Busch (fundada il 1919). Ils manaschis da Cuira en il sectur secundar han mantegnì lur caracter artisanal cun diversas interpresas da construcziun e, dapi in tschert temp, era cun intgins manaschis d'electronica. Ultra da sia funziun sco chapitala grischuna è Cuira restada, grazia a la distanza da citads pli grondas, in center da servetschs cun accents en l'economia da transport, en il commerzi da detagl ed en la scolaziun.

Cultura e scolaziun, baselgia e vita religiosa

Enturn il 1800 han gi lieu a Cuira divers tumults e dretgiras nauschas. La populaziun era dividida en aderents da l'urden vegl, reformists e revoluziunar. L'opposiziun tranter la Curt episcopala e la citad burgaisa reformada existiva anc adina. La scola catolica da la Curt è vegnida integrada pir il 1966-67 en la scola da citad. La ferma immigraziun da Grischuns, surtut Rumantschs catolics da la Surselva, da Songagliais (da la Part Sura Songagliaisa e da la Val dal Rain), da lavurers talians e tudestgs, ha midà il ca-

racter da Cuira sco citad reformada e tudestga. Dapi il 1970 è omaduas confessions represchentadas equivalentamain a Cuira. L'augment da la part da la populaziun da lingua rumantscha e taliana ha effectua la fundaziun dad uniuns linguistics e culturalas, sco per exempel il Chor Viril Alpina Cuera (1898). Daspera sa chattan a Cuira era las centralas da las organizaziuns per la promozion da la lingua e cultura taliana e rumantscha, la Pro Grigioni Italiano (1918) e la Lia Rumantscha (1919). Il dretg da vuschar e da vegnir elegi per domiciliads (1874) ha spustà las relaziuns da pussanza politics. Era senza in ferm proletariat a Cuira ha cuntanschi il moviment dals lavurers, sut l'influenza da lavurers migrants tudestgs e talians, ina tscherta impurtanza. Tranter il 1900 ed il 1914 èn proruts numerus conflicts da lavur. Durant il temp da crisa dals onns 1930 è sa dustada la citad da Cuira cun tut ils meds pussaivels cunter l'immigraziun d'esters basegus.

Il 1779 avev'ins reformà radicalmain la scola da citad. La fundaziun da las scolas chantunales confessionalas (1804) ha provocà l'aboliziun da la scola da latin. Il 1853 ha il Seminari scolastic avert sias portas a Cuira (integrà en la Scola auta da pedagogia dal Grischun dapi il 2003/04), il 1872 la Scola da perfecziunament (antecessura da la scola secundara), il 1895 la Scola da dunnas. Il 1964 è vegni fundà il Tecnicum da la saira (Scola auta da tecnica ed economia STE/HTW dapi il 2000), il 1987 la Scola superiura d'economia ed administraziun SEA/HWV). Il Teater da citad, fundà il 1923 cun in'atgna truppa ed atgnas produziuns, è vegni liquidà il 1992 en favor d'in manaschi cun represchentaziuns da gruppas ospitantas. Dapi ils onns 1970 è s'establida a Cuira l'uniun culturala Klibühni Schnidzerunft, purtada da la Klibühni - Das Theater (avert il 1974). Menziun speziala tranter las instituziuns culturalas chantunales meritan en pli il Museum retic (avert il 1872) sco era il Museum d'art dal Grischun ed il Museum grischun da la natira, naschids il 1919 sin basa da la collecziun d'art e d'instorgia natirala dal Museum retic.

Jürg Simonett

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'instorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.